


古詩錄

民國十五年季冬重印

掃葉山房發行

四



宛鄰書屋古詩錄卷十

陽湖張琦

梁詩三十家九十一首歌辭十三首

張率白紵歌七章

妙聲屢唱輕體飛。流津染面散芳菲。俱動齊息不相違。令彼嘉客愴忘歸。時久翫夜明星稀。

秋風鳴條露垂葉。空閨光盡坐愁妾。獨向長夜淚承睫。山高水深路難涉。望君光景何時接。

遙夜方遠時既寒。秋風蕭瑟白露團。佳期不待歲欲闌。念此遲暮獨無歎。鳴弦流管增長歎。

夜寒湛湛夜未央。華燈空爛月懸光。從風衣起發芬香。為君起舞幸不忘。列坐華筵紛羽爵。清曲未終月將落。歌舞及時酒常酌。無令朝露坐銷鑠。愁來夜遲猶歎息。撫枕思君終反側。金翠釵環稍不飾。霧縠流黃不能織。但坐空閨思何極。欲以短書寄飛翼。

遙夜忘寐起長歎。但望雲中雙飛翰。明月入牖風吹幔。終夜悠悠坐中旦。

誰能知我心中亂。終然有懷歲方晏。

柳惲江南曲

汀州採白蘋。日暖江南春。洞庭有歸客。瀟湘逢故人。故人何不返。春花復應晚。不道新知樂。祇言行路遠。

柳惲擣衣詩五首

孤衾引思緒。獨枕愴憂端。深庭秋草綠。高門白露寒。思君起清夜。促柱奏幽蘭。不怨飛蓬苦。徒傷蕙草殘。

行役滯風波。遊人淹不歸。亭皋木葉下。隴首秋雲飛。寒園夕鳥集。思牖草蟲悲。嗟矣當春服。安見禦冬衣。

鶴鳴勞永歎。採菘傷時暮。念君方遠遊。賤妾理紈素。秋風吹綠潭。明月懸高樹。佳人飾淨容。招攜從所務。

步櫺杳不極。離堂肅已扃。軒高夕杵散。氣爽夜砧鳴。瑤華隨步響。幽蘭逐袂生。踟躕理金翠。容與納宵清。

泛豔迴烟綠。淵旋龜鶴文。淒淒合歡袖。冉冉蘭麝芬。不怨杼軸苦。所悲千

里分。垂泣送行李。傾首遲歸雲。

庾肩吾賦得有所思

佳期竟不歸。春日坐芳菲。拂匣看離鏡。開箱見別衣。井梧生未合。宮槐卷復稀。不及銜泥燕。從來相逐飛。

庾肩吾九日侍宴樂遊苑應令

轍迹光周頌。巡遊盛夏功。鈞陳萬騎轉。閶闔九關通。秋暉逐行漏。朔氣繞相風。獻壽重陽節。迴鑿上苑中。疏山開輦道。閤樹出離宮。玉醴吹巖菊。銀牀落井桐。御禁寒更紫。仙桃秋轉紅。飲羽山西射。浮雲冀北馳。塵飛金埒滿。葉破柳條空。騰猿疑矯箭。驚雁避虛弓。彫材濫祀梓。花綬接鷓鴣。媿乏天庭藻。徒參文雅雄。

庾肩吾從皇太子出元圃應令

春光起麗譙。屣步陟山椒。閣影臨飛蓋。鸞鳴入洞簫。水還登故渚。樹長蔭前橋。綠荷生綺葉。丹藤上細苗。顧猶慙振藻。何用擬瓊瑤。

庾肩吾尋周處士宏讓

古詩錄 卷十 二 掃葉山房
試逐赤松遊。披林對一邱。紫紅大谷晚。桂白小山秋。石鏡菱花發。桐門琴
曲愁。泉飛疑度雨。雲積似重樓。王孫若不去。山中定可留。

庾肩吾過建章故臺

魯國觀遺殿。韓城想舊臺。仲宣原隰滿。子建悲風來。夏蓮猶反植。秋窗尚
左開。圖雲仍溜雨。畫水即生苔。及君歡四望。知余念七哀。

庾肩吾詠長信宮中草

委翠似知節。含芳如有情。全由履迹少。併欲上階生。

庾肩吾詠美人

絳樹及西施。俱是好容儀。非關能結束。本是細腰肢。鏡前難並照。相將映
淥池。看妝畏水動。斂袖避風吹。轉手齊裾鬪。橫簪壓鬢垂。曲中人未取。誰
堪白日移。不分他相識。惟聽使君知。

吳均秦王卷衣

咸陽春草芳。秦帝卷衣裳。玉檢茱萸匣。金泥蘇合香。初芳熏複帳。餘輝耀
玉牀。當須晏朝罷。持此贈華陽。

吳均采蓮曲

錦帶雜花鈿。羅衣垂綠川。問子今何去。出采江南蓮。遼西三千里。欲寄無因緣。願君早旋返。及此荷花鮮。

吳均雍臺

雍臺十二樓。樓樓鬱相望。隴西飛狐口。白日盡無光。

吳均行路難二首

君不見西陵田。從橫十字成陌阡。君不見東郊道。荒涼蕪沒起寒烟。盡是昔年帝王處。歌姬舞女達天曙。今日翩妍少年子。不知華盛落前去。吐心吐氣許他人。今日迴惑生猶豫。山中桂樹自有枝。心中方寸自相知。何言歲月忽若馳。君之情意與我離。還君玳瑁金雀釵。不忍見此使心危。

君不見長安客舍門。倡家少女名桃根。貧窮夜紡無燈燭。何言一朝奉至尊。至尊離宮百餘處。千門萬戶不知曙。惟聞啞啞城上烏。玉闌金井牽轆轤。丹梁翠柱飛流蘇。香薪桂火炊雕胡。當年翻覆無常定。薄命為女何必虞。

吳均別王謙

巖光不逐世。流轉任飛蓬。欲還天台嶺。不狎甘泉宮。離歌玉弦絕。別酒金
卮空。儻道故人念。僕在東山東。

吳均春詠

春從何處來。拂水復驚梅。雲障青鎖闥。風吹承露臺。美人隔千里。羅幃閉
不開。無由得共語。空對相思栢。

何遜銅雀妓

秋風木葉落。蕭瑟管絃清。望陵歌對酒。向帳舞空城。寂寂檣宇曠。飄飄帷
幔輕。曲終相顧起。日暮松柏聲。

何遜望廡前水竹答崔錄事

蕭蕭叢竹映。澹澹平湖淨。葉倒連漪文。水漾檀欒影。相思不會面。相望空
延頸。遠天去浮雲。長墟斜落景。幽疴與歲積。賞心隨事屏。鄉念一逕迴。白
髮生俄頃。

何遜酬范記室雲

林密戶稍陰。草滋階欲暗。風光蕊上輕。日色花中亂。相思不獨懽。佇立空
為歎。清談莫共理。繁文徒可玩。高唱子自輕。繼音予可憚。

何遜夕望江橋示蕭諮議楊建康江主簿

夕鳥已西度。殘霞亦半消。風聲動密竹。水影漾長橋。旅人多憂思。寒江復
寂寥。爾情深鞏洛。予念返漁樵。何因適歸願。分路一揚鏢。

何遜入西塞示南府同僚

露清曉風冷。天曙江光爽。薄雲巖際出。初月波中上。黯黯連嶂陰。騷騷急
沫響。迴植急礙浪。羣飛爭戲廣。伊余本羈客。重睽復心賞。望鄉雖一路。懷
歸成二想。在昔愛名山。自知懼獨往。情遊乃落魄。得性隨怡養。年事以蹉
跎。生平任浩蕩。方還讓夷路。誰知羨魚網。

何遜贈諸舊遊

弱操不能植。薄伎竟無依。淺智終已矣。令名安可希。擾擾從役倦。屑身
事微少。壯輕年月遲。暮惜光輝一塗今。未是萬緒昨如非。新知雖已樂。舊
愛盡睽違。望鄉空引領。極目淚沾衣。旅客長憔悴。春物自芳菲。岸花臨水

發江燕遠檣飛。無由下征帆。獨與暮潮歸。

何遜秋夕仰贈從兄寘南

堦蕙漸翻葉。池蓮稍罷花。高樹北風響。空庭秋月華。寸心懷是夜。寂寂漏方賒。撫弦乏歡娛。臨觴獨歎嗟。悽愴戶涼入。徘徊欄影斜。無為淹戚里。見就還田家。

何遜送韋司馬別

送別臨曲渚。征人幕前侶。離言雖欲繁。離思終無緒。憫憫分手畢。蕭蕭行帆舉。舉帆越中流。望別上高樓。予起南枝怨。子結北風愁。灑灑山蔽日。洶洶浪隱舟。隱舟邈已遠。徘徊落日晚。歸嚮並駕奔。別館空筵卷。想子斂眉去。知余銜淚返。銜淚心依依。薄暮行人稀。曖曖入塘港。蓬門已掩扉。簾中看月影。竹裏見螢飛。螢飛飛不息。獨愁空轉側。北窗倒長簟。南鄰夜聞織。棄置勿復陳。重陳長歎息。

何遜贈韋記室黯別

故人儻送別。停車一水東。去帆若不見。試望白雲中。促膝今何在。銜杯誰

復同水夜看初月。江晚沂歸風。無因生羽翰。千里暫排空。

何遜下方山

寒鳥樹間響。落星天際浮。繁霜白曉岸。苦霧黑晨流。鱗逆去水。瀾瀾急
還舟。望鄉行復立。瞻途近更修。誰能百里地。縈繞千端愁。

何遜學古贈邱永嘉征還

龍馬魚腸劍。躑躅起風塵。結客蔥河返。喧動四鄰。人墟猶憶舊。覓巷復
疑新。窺見應門出。遙識下機人。相悲淚欲下。離別方自陳。

何遜和蕭諮議岑離閨怨

曉河沒高棟。斜月半空庭。窗中度落葉。簾外隔飛螢。含悲下翠帳。掩泣閉
金屏。昔期今未返。春草寒復青。思君無轉易。何異北辰星。

何遜嘲劉郎

房櫺滅夜火。窗戶映朝光。妖女寒帷去。躑躅初下牀。雀釵橫曉鬢。蛾眉豔
宿妝。稍聞玉釧遠。猶憐翠被香。寧知早朝客。羞池已雁行。

何遜詠照鏡

五
掃葉山房

朱簾旦初捲。綺機晨未織。玉匣開鑑影。寶臺靜臨飾。對影獨含笑。看花時轉側。聊為出繭眉。試染天桃色。寶釵若可閒。金鈿畏相逼。蕩子行未歸。啼妝坐沾臆。

何遜學古

長安美少年。羽騎暮連翩。玉羈瑪瑙勒。金絡珊瑚鞭。陣雲橫塞起。赤日下城圓。追兵待都護。烽火望祁連。虎落夜方寢。魚麗曉復前。平生不可定。空信蒼浪天。

何遜臨行公車

擾擾排曙扉。鱗鱗驅早駕。禁門儼猶閉。嚴城方警夜。道勝多增榮。拙薄終難化。以茲畎澮質。重與滄溟舍。纜舟去濁河。揆景辭清灞。平生多意緒。懷抱皆祖謝。念此將何如。撫心獨悲咤。

何遜揚州法曹梅花盛開

兔園標物序。驚時最是梅。銜霜當路發。映雪擬寒開。枝橫卻月觀。花繞凌風臺。朝灑長門泣。夕駐臨邛杯。應知早飄落。故逐上春來。

何遜贈王左丞僧孺

欄外鶯啼罷。園裏日光斜。遊魚亂水葉。輕燕逐風花。長墟上寒靄。曉樹沒歸霞。九華暮已隱。抱鬱徒交加。

何遜敬酬王明府

星稀初可見。月出未成光。澄江照遠火。夕霞隱連樯。賤軀臨不測。玉體畏垂堂。念別已零淚。況乃思故鄉。

何遜日夕出富陽浦口和朗公

客心愁日暮。徙倚空望歸。山烟含樹色。江水映霞暉。獨鶴凌空逝。雙鳧出浪飛。故鄉千餘里。茲夕寒無衣。

何遜望新月示同羈

初宿長淮上。破鏡出雲明。今夕千餘里。雙蛾映水生的的。與沙靜。灑灑逐波輕。望鄉皆下淚。非我獨傷情。

何遜閨怨二首

竹葉響南窗。月光照東壁。誰知夜獨覺。枕前雙淚滴。

閨閣行人斷。房櫳月影斜。誰能北窗下。獨對後園花。

何遜相送

客心已百念。孤遊重千里。江暗雨欲來。浪白風初起。

何遜相送聯句

高軒雖駐軫。餘日久無暉。以我辭鄉淚。沾君送別衣。

蕭子範望秋月

河漢東西陰。清光此夜出。入帳華珠被。斜筵照寶瑟。霜慘庭上蘭。風鳴簷下橘。獨見傷心者。孤燈坐幽室。

蕭子顯春閨思

金羈遊俠子。綺機離思妾。春度人不歸。望花盡成葉。

蕭子顯春別二首

翻鶯度燕雙比翼。楊柳千條共一色。但看陌上攜手歸。誰能對此空相憶。幽宮積草自芳菲。黃鳥著樹情相依。爭風競日常聞響。重花疊葉不通飛。當知此時動妾思。慙使羅袂拂君衣。

蕭子雲落日郡西齋望海山

漁舟暮出浦。漢女採蓮歸。夕雲向山合。水鳥望田飛。蟬鳴早秋至。蕙草無芳菲。故隱天山北。夢想日依依。

蕭鈞晚景遊泛懷友

龍門依御溝。鳳輶轉芳洲。雲峰初辨夏。麥氣早迎秋。山翠餘烟積。川平晚照收。浪隨文鷁轉。渡逐彩鴛浮。風光轉未落。巖泉咽不流。一辭金谷苑。空想竹林遊。

王籍入若邪溪

艤艫何汎汎。空水共悠悠。陰霞生遠岫。陽景逐迴流。蟬噪林逾靜。鳥鳴山更幽。此地動歸念。長年悲倦遊。

王筠遊望

落日照紅妝。挾瑟當窗牖。寧復歌薜蘿。惟聞歎楊柳。結好在同心。離別由衆口。徒設露葵羹。誰酌蘭英酒。會日杳無期。薜華安得久。

劉孝綽銅雀妓

青
卷
七
歸
蔡
山
房

古詩錄 卷七
雀臺三五日。弦吹似佳期。况復西陵晚。松風吹總帷。危絃斷復續。妾心傷此時。誰言留客袂。還掩望陵悲。

劉孝綽夕逗繁昌浦

日夕江風靜。安波似未流。岸迴知舳轉。解纜覺船浮。暮烟生遠渚。夕鳥赴前洲。隔山聞戍鼓。傍浦喧棹謳。疑是辰陽宿。於此逗孤舟。

劉孝綽答何記室

游子倦飄蓬。瞻途杳未窮。晨征凌迸水。暮宿犯顛風。出洲分去燕。向浦逐歸鴻。蘭芽隱陳葉。荻苗抽故叢。忽憶園閒柳。猶傷江際楓。吾生棄武騎。高視獨辭雄。既殫孝王產。兼傾卓氏僮。罷籍睢陽園。陪謁建章宮。紛余似鑿枘。方圓殊未工。黑貂久自弊。黃金屢已空。去辭追楚穆。還耕偶漢馮。巧拙良為異。出處嗟莫同。若厭蘭臺右。見訪灞陵東。

劉孝綽古意

燕趙多佳麗。白日照紅妝。蕩子十年別。羅衣雙帶長。春樓怨難守。玉堦空自傷。復此歸飛燕。銜泥繞曲房。差池入綺幕。下上傍雕梁。故居猶可念。故

人安可忘相思昏望絕。宿昔夢容光。魂交忽在御。轉側定他鄉。徒然顧枕席。誰與同衣裳。空使蘭膏夜。炯炯對繁霜。

劉孝綽賦得照棋燭詩刻五分成

南皮絃吹罷。終奕且留賓。日下房櫳閣。華燭命佳人。側光全照局。迴花半隱身。不辭織手倦。羞令夜向晨。

劉孝綽賦得遺所思

遺簪雕玳瑁。贈綺織鴛鴦。未若華滋樹。交枝蕩子房。別前秋已落。別後春更芳。所思不可寄。惟憐盈袖香。

劉孝綽望月有所思

秋月始纖纖。微光垂步簷。腫朧入牀簟。髣髴鑿窗簾。簾螢隱光息。簾蟲映光織。玉羊東北上。金虎西南昞。長門隔清夜。高堂夢容色。如何當此時。懷清滿胸臆。

劉孝威却縣遇見人織率爾寄

妖姬含怨情。織素起秋聲。度梭環玉動。踏躡佩珠鳴。經稀疑杼澀。緯斷恨

絲輕葡萄始欲罷。鴛鴦猶未成。雲棟共徘徊。紗窗相向開。窗疏眉語度。紗
輕眼笑來。籠籠隔淺紗。的的見妝華。鏤玉同心帶。雜寶連枝花。紅衫向後
結。金簪臨鬢斜。機頂挂流蘇。機傍垂結球。青絲引伏兔。黃金繞轆轤。豔彩
裙邊出。芳脂口上渝。百城交問遺。五馬共踟躕。直為閨中人。守故不要新。
夢啼漬花枕。覺淚濕羅巾。獨眠真是難。重衾猶覺寒。逾憶凝脂暖。彌想橫
陳歡。行驅金絡騎。歸就城南端。城南稍有期。想子亦勞思。羅衣久應罷。花
釵堪更治。新妝莫點黛。余還自畫眉。

劉孝先草堂寺尋無名法師

飛鏡點青天。橫照滿樓前。深林生夜冷。複閣上宵烟。葉動花中露。湍鳴閣
裏泉。竹風聲若雨。山蟲響似蟬。摘果仍荷藉。酌水用花傳。一卮聊自飲。萬
事且蕭然。

劉遵應令詠舞

倡女多豔色。八選盡華年。舉腕嫌衫重。迴腰覺態妍。情繞陽春吹。影逐相
思絃。履度開裙褊。鬟轉帶花鈿。所愁餘曲罷。為欲在君前。

劉邈萬山見採桑人

倡妾不勝愁。結束下青樓。遂伴西城路。相攜南陌頭。葉盡時移樹。枝高乍
易鈎。絲繩挂且脫。金籠寫後收。蠶飢日已暮。詎為使君留。

陶宏景寒夜怨

夜雲生。夜鴻驚。悽切嘹唳傷夜情。空山霜滿高烟平。鉛華沈照帳孤明。寒
月微。寒風緊。愁心絕。愁淚盡。情人不勝怨。思來誰能忍。

徐悱古意酬到長史溉登琅琊城

甘泉警烽候。上谷抵樓蘭。此江稱豁險。茲山復鬱盤。表裏窮形勝。襟帶盡
巖巒。修篁壯下屬。危樓峻上干。登陣起遐望。回首見長安。金溝朝灞澗。甬
道入鴛鴦。鮮車騖華輶。汗馬躍銀鞍。少年負壯氣。耿介立衝冠。懷紀燕山
石。思開函谷丸。豈如灞上戲。羞取路傍觀。寄言封侯者。數竒良可歎。

徐摛賦得簾塵

朝逐珠胎卷。夜傍玉鈎垂。恒教羅袖拂。不分秋風吹。

劉峻自江州還入石頭詩

鼓柁浮大川。延睇洛城觀。洛城何鬱鬱。香與雲霄半。前望蒼龍門。斜瞻白鶴館。槐垂御溝道。柳綴金隄岸。迅馬晨風趨。輕輿流水散。高歌梁塵下。絃瑟荆禽亂。我思江海遊。曾無朝市玩。忽寄靈臺宿。空軫及闕歎。仲子入南楚。伯鸞出東漢。何能棲樹枝。取斃王孫彈。

劉峻始居山營室

自昔厭喧囂。執志好栖息。嘯歌棄城市。歸來事耕織。鑿戶闕蕉堯。開軒望蕝薊。激水簷前溜。修竹堂陰植。香風鳴紫鸞。高梧巢綠翼。泉脈洞杳杳。流波下不極。髣髴玉山隈。想像瑤池側。夜誦神仙記。旦吸雲霞色。將馭六龍輿。行從三鳥食。誰與金門士。撫心論胸臆。

劉緩和晚日登樓

所以登臺榭。正重接烟霞。長絲觸欄斷。歸鳥避窗斜。俯巢窺暝宿。臨樹摘高花。百雉時方晚。九層光尚賒。

荀濟贈陰梁州

副尉西域返。伏波南海邊。坎壈多構難。鬱快少騰遷。孰云功未立。寧是契

不全。直為逢迎寡。良由聽受偏。若人本高絕。芬馥邁蘭荃。驅車趨折坂。匡
坐酌貪泉。洗幘豈虛唱。席皮良信然。羣醉嫉孤醒。衆媿恐獨妍。龍旗翻委
鬱。鷄軸更迴遼。鷗勢終橫海。鵬力會冲天。昔余遇知己。一面深千祀。紆人
重結襪。辱德逾過市。詩酒悅風雲。琴歌賞桃李。淹留漢水曲。契濶渝川涘。
結綬惟貢公。推名實鮑子。徒然懷伏劍。終無報國士。高懷不可忘。劍意何
能已。已作金蘭契。何言雲雨別。咄嗟改容鬢。俄頃彌年歲。海曲窮地表。江
源表天際。雲泥已殊路。暄涼詎同節。柳絮正如絲。梅花屢成雪。月落桂陰
遠。風起萱條結。鶴舞想低昂。鷗絃夢清切。聞君戍靈關。瓜時猶未還。數汎
明月沼。頻遊向日灣。金碧應髣髴。輪鏡幾登攀。復承西歸後。將兵出湖口。
經過道路長。往來日月久。玉體何容歇。金漿故應有。陽臺可讌私。章華堪
置酒。既彈趙人瑟。復擊秦人缶。缶瑟多奇調。秦趙饒姝姁。得意在雙眸。傾
城猶一笑。伯喈思實早。十杜天終少。歿等盛姬傷。存同魏車照。君子篤久
要。宿昔盛賓僚。依依集鱗羽。眷眷共枝條。一朝限岐路。萬里異波潮。容儀雖
眇眇。夢想尚昭昭。新人不相識。故人詎相憶。杳杳閬山川。迢迢阻音息。各

附青雲。遠詎假排虛。風月接歡晏。酒醴承顏色。安知慕儔者。滄滄涕沾
軌。僕本不平人。悲愁眉亦頰。年來空自老。歲去不知春。未能全體命。於中
欲問津。五噫如適越。十上似遊秦。肌膚積霜露。力倦風塵。烏裘日日故。
白髮朝朝新。人生感意氣。相知無富貴。懷趙實廉頗。思燕惟樂毅。大筵咆
哮士。廣募嫖姚尉。映月比刀環。瞻星看劍氣。郢路一迢遠。長楸幾歔歔。渤
海水尚寬。崦嵫日猶未。丈夫志四海。兒女多辭費。待余濟濁河。從君宿清
渭。

虞羲送友人上湘

濡足送征人。塞裳臨水路。共盈一樽酒。對之愁日暮。漢廣雖容舫。風悲未
可渡。佳期難再得。但願論心故。沅水日生波。芳洲行墜露。共知邱壑改。同
無金石固。

虞羲詠霍將軍北伐

擁旄為漢將。汗馬出長城。長城地勢險。萬里與雲平。涼秋八九月。虜騎入幽
并。飛狐白日晚。瀚海愁雲生。羽書時斷絕。刀斗晝夜驚。乘墉揮寶劍。蔽日

引高旂。雲屯七萃士。魚麗六郡兵。胡茄關下思。羌笛隴頭鳴。骨都先自驚。
日逐次亡精。玉門罷斥堠。甲第始修營。位登萬庾積。功立百行成。天長地
自久。人道有虧盈。未窮激楚樂。已見高臺傾。當令麟閣上。千載有雄名。
何思澄擬古

故交不可忘。猶如蘭桂芳。新知雖可悅。不異茱萸香。妾有鳳皇曲。無非陌
上桑。薦君君不御。抱瑟自悲涼。

費昶和蕭洗馬畫屏風秋夜涼風起

佳人在河內。征夫鎮馬邑。零露一朝溥。中夜雨垂泣。氣爽牀帳冷。天寒針
縷澀。紅顏本暫時。君還詎相及。

王臺卿陌上桑四章

鬱鬱陌上桑。盈盈道傍女。送君上河梁。拭淚不能語。

鬱鬱陌上桑。遙遙山下蹊。君去成萬里。妾來守空閨。

鬱鬱陌上桑。皎皎雲間月。非無巧笑姿。皓齒為誰發。

鬱鬱陌上桑。裊裊機頭絲。君行亦宜返。今夕是何時。

朱超道詠鏡

折花須自插。不用暫臨池。當由可憐面。偏與鏡相宜。安釵釧獨響。刷鬢袖俱移。惟餘心裏恨。影中恒不知。

車綬隴頭水

隴頭征人別。隴水流聲咽。只為識君恩。甘心從苦節。雪凍弓絃斷。風鼓旗竿折。獨有孤雄劍。龍泉字不滅。

鄧鏗和陰梁州雜怨

暫別猶添恨。何忍別經時。叢桂頻銷葉。庭樹幾攀枝。君言妾貌改。妾畏君心移。終須一相見。併得兩相知。

鄧鏗月夜閨中

閨中日已暮。樓上月初華。樹陰緣砌上。窗影向牀斜。開屏寫密樹。卷帳照垂花。誰能當此夕。獨處類倡家。

包明月前溪歌

當曙與未曙。百鳥啼窗前。獨眠抱被歎。憶我懷中儂。單情何時雙。

歌辭

清商曲襄陽白銅鞮歌三首

陌頭征人去。閨中女下機。含情不能言。送別沾羅衣。
草樹非一香。花葉百種色。寄語故情人。知我心相憶。
龍馬紫金鞍。翠眊白玉羈。照耀雙闕下。知是襄陽兒。

隔谷歌二曲

兄在城中弟在外。弓無弦。箭無括。食糧乏盡若為活。救我來救我來。
兄為俘虜受困辱。骨露力疲食不足。弟為官吏馬食粟。何惜錢刀來我贖。
捉搦歌

華陰山頭百尺井。下有流水徹骨冷。可憐女子能照影。不見其餘見斜領。
折楊柳歌五曲

上馬不捉鞭。反折楊柳枝。下馬吹長笛。愁殺行客兒。
腹中愁不樂。願作郎馬鞭。出入擐郎臂。蹀座郎膝邊。
放馬兩泉澤。忘不著連羈。擔鞍逐馬走。何得見馬騎。

遙看孟津河。楊柳鬱婆婆。我是搗家兒。不解漢兒歌。
健兒須快馬。快馬須健兒。跋跋黃塵下。然後別雄雌。

折楊柳枝歌

門前一株棗。歲歲不知老。阿婆不嫁女。那得孫兒抱。

木蘭詩

唧唧復唧唧。木蘭當戶織。不聞機杼聲。惟聞女歎息。問女何所思。問女何所憶。女亦無所思。女亦無所憶。昨夜見軍帖。可汗大點兵。軍書十二卷。卷卷有爺名。阿爺無大兒。木蘭無長兄。願為市鞍馬。從此替爺征。東市買駿馬。西市買鞍韉。南市買轡頭。北市買長鞭。朝辭爺孃去。暮宿黃河邊。不聞爺孃喚女聲。但聞黃河水。鳴濺濺。旦辭黃河去。暮至黑山頭。不聞爺孃喚女聲。但聞燕山胡騎鳴啾啾。萬里赴戎機。關山度若飛。朔氣傳金柝。寒光照鐵衣。將軍百戰死。壯士十年歸。歸來見天子。天子坐明堂。策勳十二轉。賞賜百千彊。可汗問所欲。木蘭不用尚書郎。願借明駝千里足。送兒還故鄉。爺孃聞女來。出郭相扶將。阿姊聞妹來。當戶理紅妝。小弟聞姊來。磨

刀霍霍向猪羊。開我東閣門。坐我西閨牀。脫我戰時袍。著我舊時裳。當窗
理雲鬢。對鏡帖花黃。出門看火伴。火伴始驚惶。同行十二年。不知木蘭是
女郎。雄兔脚撲朔。雌兔眼迷離。兩兔傍地走。安能辨我是雄雌。

宛鄰書屋古詩錄卷十一

陽湖張琦

陳詩十二家六十四首

後主巫山高

巫山巫峽深。峭壁聳春林。風巖朝蕊落。霧嶺晚猿吟。雲來足薦枕。雨過非感琴。仙姬將夜月。度影自浮沉。

後主自君之出矣二首

自君之出矣。房空帷帳輕。思君如畫燭。懷心不見明。
自君之君矣。不分道無情。思君若寒草。零落故心生。

後主玉樹後庭花

麗宇芳林對高閣。新妝豔質本傾城。映戶凝嬌乍不進。出帷含態笑相迎。
妖姬臉似花含露。玉樹流光照後庭。

後主東飛伯勞歌

池側鴛鴦春日鶯。綠珠絳樹相逢迎。誰家佳麗過淇上。翠釵綺袖波中漾。
雕軒繡戶花恒發。珠簾玉砌移明月。年時二七猶未笄。轉顧流盼鬢鬢低。

風飛蕊落將何故。可惜可憐空擲度。

後主獻歲立春光風具美泛舟玄圃各賦六韻

寒輕條已翠。春初未轉禽。野雪明岩曲。山花照迴林。苔色隨冰溜。樹影帶風沈。沙長見水落。歌遙覺浦深。餘輝斜四戶。流風颺八音。既此留連席。逾欣放曠心。

沈后答後主

誰言不相憶。見罷倒成羞。情知不肯住。教遣若為留。

陰鏗班婕妤好怨

柏梁新寵盛。長信昔恩傾。誰謂詩書巧。翻為歌舞輕。花月分窗進。苔草共階生。接淚衫前滿。單眠夢裏驚。可惜逢秋扇。何用合歡名。

陰鏗和登百花亭懷荆楚

江陵一柱觀。潯陽千里潮。風烟望似接。川路恨成遙。落花輕未下。飛絲斷易飄。藤長還依格。荷生不避橋。陽臺可憶處。惟有暮將朝。

陰鏗江津送劉光祿不及

依然臨送渚。長望倚河津。鼓聲隨聽絕。帆勢與雲鄰。泊處空餘鳥。離亭已
散人。林寒正下葉。釣晚欲收綸。如何相背遠。江漢與城闕。

陰鏗渡青草湖

洞庭春溜滿。平湖錦帆張。沅水桃花色。湘流杜若香。穴去茅山近。江連巫
峽長。帶天澄迥碧。映日動浮光。行舟逗遠樹。度鳥息危樑。滔滔不可測。一
葦詎能航。

陰鏗開善寺

鷺嶺春光遍。王城野望通。登臨情不極。蕭散趣無窮。鷺隨入戶樹。花逐下
山風。棟裏歸雲白。窗外落暉紅。古石何年卧。枯樹幾春空。淹留昔未及。幽
桂在芳叢。

陰鏗和侯司空登樓望鄉

懷土臨霞觀。思歸想石門。瞻雲望鳥道。對柳憶家園。寒田獲裏靜。野日燒
中昏。信美今何益。傷心自有源。

陰鏗晚出新亭

大江一浩蕩。離悲足幾重。潮落猶如蓋。雲昏不作峯。遠戍惟聞鼓。寒山但見松。兀十方稱半。歸途詎有蹤。

陰鏗晚泊五洲

客行逢日暮。結纜晚洲中。戍樓因碛險。村路入江窮。水隨雲度黑。山帶日歸紅。遙臨一柱觀。欲輕千里風。

陰鏗侯司空宅咏妓

佳人遍綺席。妙曲動鶻絃。樓似陽臺上。池如洛水邊。鶯啼歌扇後。花落舞衫前。翠柳將斜日。俱照晚妝鮮。

陰鏗雪裏梅花

春近寒雖轉。梅舒雪尚飄。從風還共落。照日不俱消。葉開隨足影。花多助重條。今來漸異昨。向晚判勝朝。

徐陵中婦織流黃

落花還井上。春機當戶前。帶衫行障口。覓釧枕檀邊。數鐻經無亂。新漿緯易牽。蜘蛛夜伴織。百舌曉驚眠。封用黎陽土。書因計吏船。欲知夫壻處。令

督水衡錢

徐陵出自薊北門行

薊北卽長望。黃昏心獨愁。燕山對古剎。代郡隱城樓。屢戰橋恒斷。長冰壑不流。天雲如地陳。漢月帶胡秋。漬土泥函谷。接繩縛涼州。平生燕領相。會自得封侯。

徐陵隴頭水

別墅聳千仞。離川懸百丈。攢荆夏不通。積雪冬難上。枝交隴底暗。石礙波前響。回首咸陽中。惟言夢時往。

徐陵折楊柳

嫋嫋河堤樹。依依魏主營。江陵有舊曲。洛下作新聲。妾對長楊苑。君登高柳城。春還應共見。蕩子太無情。

徐陵關山月

關山三五月。客子憶秦川。思婦高樓上。當窗應未眠。星旗映疏勒。雲陳上祁連。戰氣今如此。從軍復幾年。

徐陵洛陽道

綠柳三春暗。紅塵百戲多。東門向金馬。南陌接銅駝。華軒翼葆吹。飛蓋響鳴珂。潘郎車欲滿。無奈擲花何。

徐陵梅花落

對戶一株梅。新花落故栽。燕拾還蓮井。風吹上鏡臺。倡家愁思妾。樓上獨徘徊。啼看竹葉錦。窳罷未能裁。

徐陵長相思二首

長相思。望歸難。傳聞奉詔戍皋蘭。龍城遠。雁門寒。愁來瘦轉劇。衣帶自然寬。念君今不見。誰為抱腰看。

長相思。好春節。夢裏恒啼悲不洩。帳中起。窗前髻。柳絮飛。還聚遊絲斷。復結。欲見洛陽花。如君隴頭雪。

徐陵山齋

桃源驚往客。鶴嶠斷來賓。復有風雲處。蕭條無俗人。山寒微有雪。石路本無塵。竹徑蒙籠巧。茅齋結構新。燒香披道記。懸鏡厭山神。砌水何年溜。檐

桐幾度春。雲霞一已絕。寧辨漢將秦。

徐陵別毛永嘉

願子厲風規。歸來振羽儀。嗟予今老病。此別空長離。白馬君來哭。黃泉我詎知。徒勞脫寶劍。空挂隴頭枝。

徐陵秋日別庾正員

征途愁轉旆。連騎慘停鑣。朔氣凌疏木。江風送上潮。青雀離帆遠。朱鷺別路遙。惟有當秋月。夜夜上河橋。

徐陵詠織婦

纖纖運玉指。脈脈正蛾眉。振鐻開交縷。停梭續斷絲。檐前初月照。洞戶朱帷垂。弄機行掩淚。彌令織素遲。

徐陵內園遂涼

昔日北山北。今來東海東。納涼高樹下。直坐落花中。狹逕長無迹。茅齋本自空。提琴就竹篠。酌酒勸梧桐。

徐陵春日

古詩錄 卷十一 四 掃葉山房

岸烟起暮色。岸水帶斜暉。逕狹橫枝度。簾搖驚燕飛。落花承步履。流澗瀉行衣。何殊九枝蓋。薄暮洞庭歸。

徐陵奉和簡文帝山齋

架嶺承金闕。飛橋對石梁。竹密山齋冷。荷開水殿香。山花臨舞席。水影照歌牀。闕

沈炯長安還至方山愴然自傷

秦軍坑趙卒。遂有一人生。雖還舊鄉里。危心曾未平。淮源比桐柏。方山似削成。猶疑屯虜騎。尚畏值胡兵。空村餘拱木。廢邑有頽城。舊識既已盡。新知皆異名。百年三萬日。處處此傷情。

周宏正隴頭送征客

胡霜侵漢草。流沙度隴飛。一聞流水曲。行住雨衣。

陸瓊長相思

長相思。久離別。一罷鴛文綺。薦絕鴻已去。柳堪結。室冷鏡疑冰。庭幽花似雪。容貌朝朝改。書字看看減。

陸瑜東飛伯勞歌

西王青鳥秦女鸞。姮娥婺女慣相看。誰家玉顏窺上路。粉色衣香雜風度。
九重樓檻夫容華。四鄰照鏡菱菱花。新妝年幾纔三五。隱幔羞羞臨網戶。
然香氣歇不飛烟。空留可憐年一年。

張正見採桑

春樓曙鳥驚。蠶妾候初晴。迎風金珥落。向日玉釵明。徙顧移籠影。攀鉤動
釧聲。葉高知手弱。枝軟覺身輕。人多羞借問。年少怯逢迎。恐疑夫壻遠。聊
復答專城。

張正見豔歌行

城隅上朝日。斜暉照杏梁。併捲茱萸帳。爭移翡翠牀。縈環脚向牖。拂鏡且
調妝。裁金作小壓。散麝起微黃。二八秦樓婦。三十侍中郎。執戟起丹地。豐
貂入建章。未安文史國。獨結少年場。鸞孤貫葉影。學劍動星芒。翠蓋飛城
曲。金鞍橫道傍。調鷹向新市。彈雀往睢陽。行行稍有極。暮暮歸蘭房。前瞻
富羅綺。左顧足鴛鴦。蓮舒千葉氣。燈吐百枝光。滿酌胡姬酒。多燒荀令香。

不學幽閨妾。生離怨採桑。

張正見置酒高殿上

曹子建登樓引曰置酒高殿上親友從我遊

陳王開甲第。粉壁麗椒塗。高窗侍玉女。飛閣敞金鋪。名香散綺幕。石硯彫金鑪。清醪稱玉饋。浮蟻擅蒼梧。鄒嚴恒接武。申白日相趨。容與升階玉。差池曳履珠。千金一巧笑。百萬兩鬢姝。趙姬未鼓瑟。齊客罷吹竽。歌喧桃與李。琴挑鳳將雛。魏君慙舉白。晉主媿投壺。風雲更代序。人事有榮枯。長卿病消渴。壁立還成都。

張正見門有車馬客行

飛觀霞光啟。重門平旦開。北闕高箱過。東方連騎來。紅塵揚翠轂。赭汗染龍媒。桃花夾逕聚。流水傍池回。揮鞭脚接電。捐軫暫停雷。非關萬里客。自有六奇才。琴和朝雉操。酒泛夜光杯。舞袖飄金谷。歌聲遠鳳臺。良時不可再。騶馭鬱相催。安知太行道。失路車輪摧。

張正見怨詩

新豐妖冶地。遊俠競驕奢。池臺閒羅綺。桃李雜烟霞。蓋影分連騎。衣香合

並車。豔粉驚飛蝶。紅妝映落花。舞衫飄冶袖。歌扇掩團紗。玉牀珠帳卷。金樓鏡月斜。還疑蕭史鳳。不及李倫家。

張正見輕薄篇

洛陽美年少。朝日正開霞。細蹠連錢馬。傍趨首宿花。揚鞭還卻望。春色滿東家。井桃映水落。門柳雜風斜。綿蠻弄清綺。蛺蝶遠承華。欲往飛廉館。遂駐李倫車。石榴傳瑪瑙。蘭香真象牙。聊持自娛樂。未是鬪豪奢。莫嫌龍馭晚。扶桑復浴鷗。

張正見戰城南

薊北馳胡騎。城南接短兵。雲屯兩陳合。劍聚七星明。旗交無復影。角憤有餘聲。戰罷披軍策。還嗟李少卿。

張正見臨高臺

層臺通清漢。出迴駕重琴。飛棟臨黃鶴。高窗度白雲。風前朱幌色。霞處綺疏分。此中多怨曲。地遠詎能聞。

張正見長安有狹邪行

少年重遊俠。長安有狹邪。路窄時容馬。枝交未礙車。簷高同落照。巷小共飛花。相逢夾繡轂。借問是誰家。

張正見山家閨怨

王孫春好遊。雲鬢不勝愁。離鴻暫罷曲。別路已經秋。山中桂花晚。勿為俗人留。

張正見賦得佳期竟不歸

良人萬里向河源。娼婦三秋思柳園。路遠寄詩空織錦。宵長夢返欲驚魂。飛蛾屢遠帷前燭。衰草還侵階上玉。銜啼拂鏡不成妝。促柱繁絃還亂曲。時分年移竟不歸。偏憎寒急夜縫衣。流螢映月明空帳。疏葉從風入斷機。自對孤鸞向影絕。終無一雁帶書回。

江總折楊柳

萬里音塵絕。千條楊柳結。不悟倡園花。遙同羌嶺雪。春心自浩蕩。春樹聊攀折。共此依依情。無奈年年別。

江總怨詩二首

採桑歸路河流深。憶昔相期柏樹林。奈許新縑傷妾意。無由故劍動君心。
新梅嫩柳未障羞。情去恩移那可留。團扇篋中言不分。纖腰掌上詎勝愁。

江總雜曲三首

行行春逕蘼蕪綠。織素那復解琴心。乍愜南階悲綠草。誰堪東陌怨黃金。
紅顏素月俱三五。夫婿何在。今追虜。闕山隴。月春雪深。誰見人啼花照戶。
殿內一處起金房。併勝餘人白玉堂。珊瑚挂鏡臨網戶。芙蓉作帳照雕梁。
房櫳宛轉垂翠幕。佳麗逶迤隱珠箔。風前花管颺難留。舞處花鈿低不落。
陽臺通夢太非真。洛浦凌波復不新。曲中惟聞張女調。定有同姓可憐人。
但願私情賜斜領。不願傍人相比並。妾門逢春自可榮。君面未秋何意冷。
秦山言應可轉移。新寵不信更參差。合歡錦帶鴛鴦鳥。同心綺袖連理枝。
皎皎新秋明月開。早露飛螢暗裏來。鯨燈落花殊未盡。虬水銀箭莫相催。
非是神女期河漢。別有仙娥入吹臺。未眠解著同心結。欲醉那堪連理杯。
後宮不愜茱萸芳。夜夜爭開蘇合房。寶釵翠鬢還相似。朱唇玉面非一行。
新人永語言如澀。新寵無前判不減。願奉更衣蘭麝氣。恐君馬到自驚香。

江總宛轉歌

七月天河白露明。八月濤水秋風驚。樓中恒聞哀響曲。塘上復有辛苦行。
不解何意悲秋氣。直置無秋悲自生。不怨前階促織鳴。偏愁別路搗衣聲。
別燕差池自有返。離蟬寂寞莫詎含情。雲聚懷清四望臺。月冷相思九重觀。
欲題芍藥詩不成。來採夫容花已散。金樽送曲韓娥起。玉柱調絃楚妃歎。
翠眉結恨不復開。寶鬢迎秋度前鬢。湘妃拭淚灑貞筠。芙蓉浣衣何處人。
步步香飛金薄履。盈盈扇掩珊瑚昏。已言採桑期陌上。復能解佩就江濱。
競入華堂耍花枕。爭開羽帳奉華茵。不惜獨眠前下釣。欲許便作後來薪。
後來暝暝同玉牀。可憐顏色無比方。誰能巧笑特窺井。乍取新聲學繞梁。
宿處留嬌墮黃珥。鏡前含笑弄明璫。卷施摘心心不盡。茱萸折葉葉更芳。
已聞能歌洞簫賦。詎是故愛邯鄲倡。

江總秋日登廣州城南樓

秋城韻晚笛。危榭引清風。遠氣疑埋劍。驚禽似避弓。海樹一邊出。山雲四面通。
野火初烟細。新月半輪空。塞外離羣客。顏鬢早如蓬。徒懷建鄴水。復

想洛陽宮。不及孤飛雁。獨在上林中。

江總遇長安使寄裴尚書

傳聞合浦葉。遂向洛陽飛。北風尚嘶馬。南冠獨不歸。去雲目徒送。離琴手自揮。秋蓬失處所。春草屢芳菲。太息關山月。風塵客子衣。

江總南還尋草市宅

紅顏辭鞏洛。白首入轅轅。乘春行故里。徐步採芳蓀。逕毀悲求仲。林殘憶巨源。見桐猶識井。看柳尚知門。花落空難遍。鶯啼靜易諠。無人訪語默。何處敘寒溫。百年獨如此。傷心豈復論。

江總於長安歸還揚州九月九日行薇山亭賦韻

心逐南雲逝。身隨北雁來。故鄉籬下菊。今日幾花開。

江總新入姬人應令

洛浦流風漾淇水。秦樓初日度陽臺。玉軼輕綸五香散。金燈夜火百花開。非是妖姬渡江日。定言神女隔河來。來時向月別姮娥。別時清吹悲簫史。數錢拾翠爭佳麗。拂紅點黛何相似。本持纖腰惑楚宮。暫迴舞袖驚吳市。

新入羽帳挂流蘇。故人網戶織蜘蛛。梅花柳色春難遍。情來春去在須臾。不用庭中賦綠草。但願思著弄明珠。

江總閨怨篇

寂寂青樓大道邊。紛紛白雪綺窗前。池上鴛鴦不獨自。帳中蘇合還空然。屏風有意障明月。燈火無情照獨眠。遼西水凍春應少。薊北鴻來路幾千。願君關山及早度。念妾桃李片時妍。

江總姐人怨

天寒海水慣相知。空牀明月不相宜。庭中芳桂惟悴葉。井上疏桐零落枝。寒燈作花羞夜短。霜雁多情恒結伴。非為隴水望秦川。直置思君腸自斷。

張君祖詠懷

運形不標異。澄懷恬無欲。座可棲王侯。門可迴金輅。風來詠逾清。鱗萃淵不濁。斯乃玄中子。所以矯逸足。何必翫幽閒。青衿表離俗。百齡苟未遐。昨辰亦非促。曦騰望舒映。曩今迭相燭。一世皆逆旅。安悼電往速。區區雖非黨。兼忘混礫玉。恪神罔叢穢。要在夷心曲。

釋洪偃遊鍾山之開善定林息心晏坐引筆賦詩

杖策步前嶺。褰裳出外扉。輕蘿轉蒙密。幽逕復紆威。樹高枝影細。山靜鳥聲稀。石苔時滑屐。蟲網乍粘衣。澗旁紫芝耀。巖上白雲扉。松子排烟去。堂生寂不歸。窮谷無還往。攀桂獨依依。

魏詩五家九首

胡太后楊白華

陽春二三月。楊柳齊作花。春風一夜八閨闈。楊花飄蕩落南家。含情出戶腳無力。拾得楊花淚沾臆。秋去春還雙燕子。願銜楊花入窠裏。

咸陽王宮人歌

後魏景明中咸陽王禧謀逆伏誅後宮人為之歌流於江表北人之在南者聞之莫不灑泣

可憐咸陽王。奈何作事誤。金牀玉肌不能眠。夜踏霜與露。洛水湛湛彌岸長。行人那得渡。

蕭綜悲落葉

悲落葉。聯翩下重疊。重疊落且飛。縱橫去不歸。長枝交蔭昔。何密黃鳥闕。闕動相失夕。藥雜凝露朝。花翻亂日。亂春日。起春風。春風春日此時同。一

霜兩霜猶可當。五晨六旦已颯黃。乍逐驚風舉。高下任飄揚。悲落葉。落葉
何時還。風昔共根本。無復一相關。各隨灰土去。高枝難重攀。

常景讚四君四首

景淹滯門下以蜀四君皆有
高才而無重位乃託意讚之

司馬相如

長卿有豔才。直致不羣性。鬱若春烟舉。皎如秋月映。遊梁雖好仁。仕漢常
稱病。清貞非我事。窮達委天命。

王褒

王子挺秀質。逸氣干青雲。明珠既絕谷。白鵠信驚羣。才世苟不合。遇石途
自分。空枉碧雞命。徒獻金馬文。

嚴君平

嚴君性沈靜。立志明霜雪。味道綜微言。端著演妙說。才屈羅仲口。位結李
強舌。素尚邁金貞。清標凌玉徹。

揚雄

蜀江導清流。揚子挹餘休。含光絕後彥。覃思邈前修。世輕久不賞。玄談物

無求當塗謝權寵。置酒得閒遊。

溫子昇從駕幸金墉城

茲城實佳麗。飛甍自相並。膠葛擁行風。峇堯閱流景。御溝屬清洛。馳道通丹屏。湛淡水成文。參差樹交影。長門久已閉。離宮一何靜。細草緣玉階。高枝蔭桐井。微微夕渚暗。肅肅暮風冷。神行揚翠旗。天臨肅清警。伊臣從下列。逢恩信多幸。康衢雖已泰。弱力將安騁。

溫子昇詠花蝶

素蝶向林飛。紅花逐風散。花蝶俱不息。紅素還相亂。芬芳共襲手。歲蕤從可玩。不慰行客心。遽動離居歎。

北齊詩五家九首

邢邵思公子

綺羅日減帶。桃李無顏色。思君君未歸。歸來豈相識。

邢邵三日華林園公宴

迴鸞自樂野。弭蓋屬瑤池。五丞接光景。七友樹風儀。芳春時欲遽。覽物惜

將移。新萍已冒沼。餘花尚滿枝。草滋徑無沒。林長山蔽虧。芳筵羅玉俎。激水漾金卮。歌聲斷且續。舞袖合還離。

邢劭冬夜酬魏少傅直史館

年病從橫至。動息不自安。兼豆未能飽。重裘詎解寒。況乃冬之夜。霜氣有餘酸。風音響北牖。月影度南端。燈光明且滅。華燭新復殘。衰顏依候改。壯志與時闌。體羸不盡帶。髮落強扶冠。夜景將欲近。夕息故無寬。忽有清風贈。辭義婉如蘭。先言歎三友。次言慙一官。麗藻高鄭衛。專學美齊韓。審諭雖有屬。筆削少能干。高足自無限。積風良可搏。空想青門易。寧見赤松難。寄語東山道。高駕且盤桓。

邢劭冬日傷志篇

昔時情遊士。任性少矜裁。朝驅瑪瑙勒。夕銜熊耳柅。折花步淇水。撫瑟望叢臺。繁華夙昔改。哀病一時來。重以三冬月。愁雲聚復開。天高日色淺。林勁鳥聲哀。終風激檐宇。餘雪滿條枚。遨遊昔宛洛。踟躕今草萊。時事方去矣。撫己獨傷懷。

邢劭七夕

盈盈河水側。朝朝長歎息。不怯漸衰苦。波流詎可測。秋期忽云至。停梭理容色。束衿未解帶。迴鑿已沾軼。不見眼中人。誰堪機上織。願逐青鳥去。暫因希羽翼。

祖珽從北征

翠旗臨塞道。靈鼓出桑乾。祁山斂氛霧。瀚海息波瀾。戍亭秋雨急。闕門朔氣寒。方繫單于頸。歌舞入長安。

荀仲舉銅雀臺

高臺秋色晚。直望已悽然。况復歸風便。松聲入斷絃。淚逐梁塵下。心隨團扇捐。誰堪三五夜。空對月光圓。

蕭愨和崔侍中從駕經山寺

鈎陳夜警微。河漢曉縱橫。游騎騰文馬。前驅轉翠旌。野禽喧曙色。山樹動秋聲。雲表金輪見。巖端畫栱明。塔疑從地湧。蓋似積香成。泉高下溜急。松古上枝平。儀台多此思。麗藻慰緣情。自嗤非照乘。何以繼連城。

蕭愨秋思

清波收潦日。華林鳴籟初。夫容露下落。楊柳月中疏。燕帷綉綺被。趙帶流黃裾。相思阻音信。結夢感離居。

蕭愨春日曲水

落花無限數。飛鳥排花度。禁苑至饒風。吹花春滿路。巖前片石迴如樓。水裏連沙聚作洲。二月鶯聲纔欲斷。三月春風已復流。分流繞小渡。塹水還相注。山頭望水雲。水底看山樹。舞餘香尚存。歌盡聲猶住。麥壘一鷺。顰菱潭雨飛鷺。飛鷺復鷺。暈。傾曦帶掩扉。芳飈翼還憶。藻露泛行衣。

顏之推古意二首

十五好詩書。二十彈冠仕。楚王賜顏色。出入章華裏。作賦凌屈原。讀書誇左史。數從明月譙。或侍朝雲祀。登山摘紫芝。泛江採綠芷。歌舞未終曲。風塵暗天起。吳師破九龍。秦兵割千里。狐兔穴宗廟。霜露沾朝市。璧入邯鄲宮。劍去襄城水。未獲殉陵墓。獨生良足耻。憫憫思舊都。惻惻懷君子。白髮闕明鏡。憂傷沒余齒。

寶珠出東國。美玉產南荆。隨侯燿我色。下代飛吾聲。已加明稱物。復飾夜
光名。驪龍旦夕駭。白虹朝暮生。華彩燭兼乘。價值詎連城。常悲黃雀起。每
畏靈蛟迎。千仞安可捨。一毀難復營。昔為時所重。今為時所輕。願與濁泥
會。思將垢石并。歸真山岳下。抱潤濟其榮。

斛律金敕勒歌

敕勒川。陰山下。天似穹廬。籠蓋四野。天蒼蒼。野茫茫。風吹草低見牛羊。

馮淑妃感琵琶絃

淑妃侍周代王達彈琵琶因絃斷作詩

雖蒙今日寵。猶憶昔時憐。欲知心斷絕。應看膝上絃。

[Faint vertical text columns, likely bleed-through from the reverse side of the page]

宛鄰書屋古詩錄卷十二

陽湖張琦

北周詩三家九十五首

王褒從軍行

兵書久閑習。征戰數曾經。講戎平樂觀。學戲羽林亭。西征度疏勒。東驅出井陘。牧馬濱長渭。營軍毒上涇。平雲如陣色。半月類城形。羽書封信璽。詔使動流星。對岸流沙白。緣河柳色青。將幕恒臨斗。旗門常背邢。勳封瀚海石。功勒燕然銘。兵勢因麾下。軍圖送掖庭。誰憐下玉筋。向暮掩金屏。

王褒長安有狹邪行

威紆狹邪道。車騎動相喧。博徒稱劇孟。游俠號王孫。勢傾魏侯府。交盡翟公門。路邪勞夾轂。塗艱倦折轅。日斜宣曲觀。春還御宿園。塗歌楊柳曲。巷飲榴花樽。獨有遊梁客。還守孝文園。

王褒出塞

飛蓬似征客。千里自長驅。塞禽惟有雁。關樹但生榆。背山看故壘。繫馬識餘蒲。還因麾下騎。來送月支圖。

王哀關山月

關山夜月明。秋色照孤城。影虧同漢陳。輪滿逐胡兵。天寒光轉白。風多暈欲生。寄言亭上吏。遊客解雞鳴。

王哀古曲

青樓臨大道。遊俠盡淹留。陳王金被馬。秦女柱為鉤。馳輪洛城巷。鬪鷄南陌頭。薄暮風塵起。聊為清夜遊。

王哀燕歌行

初春麗景鶯欲嬌。桃花流水沒河橋。薔薇花開百重葉。楊柳拂地數千條。隴西將軍號都護。樓蘭校尉稱嫖姚。自從昔別春燕分。經年一去不相聞。無復漢地關山月。惟有漠北薊城雲。淮南桂中明月影。流黃機上織成文。充國行軍屢築營。陽史討虜臨平城。城下風多能卻陳。沙中雪淺詎停兵。屬國小婦猶年少。羽林輕騎數征行。遙聞陌頭採桑曲。猶勝邊地胡笳聲。胡笳向暮使人泣。長望閨中空佇立。桃花落地杏花舒。桐生井底寒葉疏。試為來看上林雁。應有遙寄隴頭書。

王哀渡河北

秋風吹木葉。還似洞庭波。常山臨代郡。亭障繞黃河。心悲異方樂。腸斷隴頭歌。薄暮臨征馬。失道北山阿。

庾信結客少年場行

結客少年場。春風滿路香。歌撩李都尉。果擲潘河陽。隔花遙勸酒。就水更移牀。今年喜夫壻。新拜羽林郎。定知劉碧玉。偷嫁汝南王。

庾信烏夜啼

促柱繁絃非子夜。歌聲舞態異前溪。御史府中何處宿。洛陽城頭那得棲。彈琴蜀郡卓家女。織錦秦川竇氏妻。詎不自驚長淚落。到頭啼烏恒夜啼。

庾信燕歌行

代北雲氣晝昏昏。千里飛蓬無復根。寒雁嗥嗥渡遼水。桑葉紛紛落薊門。晉陽山頭無箭竹。疏勒城中乏水源。屬國征戍久離居。陽關音信絕能疏。願得魯連飛一箭。持寄思歸燕。將書渡遼本自有將軍。寒風蕭蕭生水紋。妾驚甘泉足烽火。君訝漁陽少陳雲。自從將軍出細柳。蕩子空牀難獨守。

盤龍明鏡餉秦嘉。辟惡生香寄韓壽。春分燕來能幾日。二月蠶眠不復久。洛陽遊絲百丈連。黃河春冰千片穿。桃花顏色好如馬。榆莢新開巧似錢。蒲桃一柸千日醉。無事九轉學神仙。定取金丹作幾服。能令華表得千年。

庾信楊柳歌

河邊楊柳百丈枝。別有長條踈地垂。河水衝激根株危。條忽河中風浪吹。可憐巢裏鳳皇兒。無故當年生別離。流槎一去上天池。織女支機當見隨。誰言從來蔭數國。直用東南一小枝。昔日公子出南皮。何處相尋玄武陂。駿馬翩翩西北馳。左右彎弧仰月支。連錢障泥渡水騎。白玉手板落盤螭。君言丈夫無意氣。試問燕山那得碑。鳳皇新管簫史吹。朱鳥春窗玉女窺。銜雲酒柸赤瑪瑙。照日食螺紫琉璃。百年霜露奄離披。一旦功名不可為。定是懷王作計誤。無事翻覆用張儀。不如飲酒高陽池。日暮歸時倒接羅。武昌城下誰見移。官渡營前那可知。獨憶飛絮鵝毛下。非復青絲馬尾垂。欲與梅花留一曲。共將長笛管中吹。

陵公子亦指元帝懷王誤用張儀乃推原禍始歸
答梁武之納侯景武昌見移以下旨陳移梁祚
指長條指湘東王河水指侯景鳳皇兒
指簡文帝東南小枝指元帝即位江

庾信奉和泛江

春江下白帝。畫舸向黃牛。錦纜回沙磧。蘭橈避荻洲。溼花隨水泛。空巢逐樹流。建平船楫下。荆門戰艦浮。岸社多喬木。山城足迴樓。日落江風靜。龍吟迴上游。

庾信陪駕幸終南山和宇文內史

玉山乘四載。瑤池宴八龍。鼇橋浮少海。鵠蓋上中峯。飛狐橫塞路。白馬當河衝。水奠三川石。山封五樹松。長虹雙瀑布。圓闕兩夫容。戍樓鳴夕鼓。山寺響晨鐘。新蒲節轉促。短荀穉猶重。樹宿含櫻鳥。花留釀蜜蜂。迎風下列缺。灑酒召昌容。且欣陪北上方。欲待東封。

庾信奉報寄洛州

舟師會孟津。甲子陳東鄰。雷轅驚戰鼓。劍室動金神。幕府風雲氣。軍門關塞人。長旂析鳥羽。合甲抱犀鱗。星芒一丈燄。月暈七重輪。黎陽水稍滌。官渡柳應春。無庸奉天曉。驅傳牧南秦。繁詞勞簡牘。雜俗弊風塵。上洛逢都尉。商山見逸民。留滯終南下。惟當一史臣。

庾信從駕觀講武

校戰出長楊。兵欄入鬪場。置陣橫雲起。開營雁翼張。門嫌磁石礙。馬畏鐵
菱傷。龍淵觸牛斗。繁弱駭天狼。落星奔驥跡。浮雲上驕驕。急風吹戰鼓。高
塵擁貝裝。駭猿時落水。驚鴻屢斷行。樹寒條更直。山枯菊轉芳。豹略推全
勝。龍圖揖所長。小臣欣寓目。還知奉會昌。

庾信奉報趙王出師在道賜詩

上將出東平。先定下江兵。彎弓伏石動。振鼓沸沙鳴。橫海將軍號。長風駿
馬名。雨歇殘虹斷。雲歸一雁征。暗巖朝石溼。空山夜火明。依橋澗底渡。狹
路花中行。錦車同建節。魚軒異泊營。軍中女子氣。塞外夫人城。小人乖攝
養。歧路阻逢迎。幾月芝田熟。何年金竈成。哀笳闕塞曲。嘶馬別離聲。王子
身為寶。深思不倚衡。

庾信和趙王送峽中軍

樓船聊習戰。白羽試搗軍。山城對卻月。岸陳抵平雲。赤地懸弩影。流星抱
劍文。胡笳遙警夜。塞馬暗嘶羣。客行明月峽。猿聲不可聞。

庾信侍從徐國公殿下軍行

八風占陳氣。六甲候兵韜。置府仍張幕。麾軍即秉旄。長旗臨廣武。烽火照成皋。巡寒重挾纊。酌水勝單醪。陳後雲逾直。兵深星轉高。電綖驅龍馬。山精鏤寶刀。塞迴翻榆葉。關寒落雁毛。既得從神武。何須念久勞。

庾信同盛記室從軍

河圖論陳氣。金匱辨星文。地中鳴鼓角。天上下將軍。函庫恒七屬。絡鐵本千羣。飛梯脚度絳。合弩暫凌汾。寇陳先中斷。妖營即兩分。連烽對嶺渡。嘶馬隔河聞。箭飛如疾雨。城崩似壞雲。英王於此戰。何用武安君。

庾信伏聞遊獵

虞旗喜旦晴。獵馬向山橫。石闕魚貫上。山梁雁散行。雪平尋兔跡。林叢聽雉聲。馬嘶山谷響。弓寒桑柘鳴。聞絃鳥自落。望火獸空驚。無風樹即正。不凍水還平。誰知茂陵下。願入睢陽城。

庾信見征客始還遇獵

貳師新受詔。長平正凱歸。猶言乘戰馬。未得解戎衣。上林遇逐獵。宜春暫

合圍漢帝熊猶憤。秦王雉更飛。故人迎借問。念舊始依依。河邊一片石。不復肯支機。

庾信奉和同秦寺浮圖

蒼蒼凌太清。照殿北東京。長影臨雙闕。高層出九城。栱積行雲礙。幡搖渡鳥驚。鳳飛如始泊。蓮合似初生。輪重對月滿。鐸韻擬鸞聲。畫水流全住。圖雲色半行。露晚盤猶滴。珠朝火更明。雖連博望苑。還接銀沙城。天香下桂殿。仙梵入伊笙。度聞八解樂。方遣六塵情。

庾信擬詠懷十四首

步兵未飲酒。中散未彈琴。索索無真氣。昏昏有俗心。酒酣常思水。驚飛每失林。風雲能變色。松竹且悲吟。由來不得意。何必往長岑。

俎豆非所習。帷幄復無謀。不言班定遠。應為萬里侯。燕客思遼水。秦人望隴頭。倡家遭強聘。質子值仍留。自憐才智盡。空傷年鬢秋。

橫流遺屯隱。上塲結重氛。哭市聞妖獸。頽山起怪雲。綠林多散卒。清波有敗軍。智士今安用。忠臣且未聞。惜無萬金產。東求滄海君。此言侯景之禍

鬪麟能食日。戰水定驚龍。鼓鞀喧七萃。風塵亂九重。鼎湖去無返。蒼梧悲不從。徒勞銅雀伎。遙望西陵松。

此哀梁武

六國始咆哮。縱橫未定交。欲競連城玉。翻徵縮酒茅。析骸猶換子。登甕已懸巢。壯冰初開地。盲風正折膠。輕雲飄馬足。明月動弓梢。楚師正圍鞏。秦兵未下嶠。始知千載內。無復有申包。

此指魏伐梁

日晚荒城上。蒼茫餘落暉。都護樓蘭返。將軍疏勒歸。馬有風塵氣。人多關塞衣。陳雲平不動。秋蓬卷欲飛。聞道樓船戰。今年不解圍。

白馬向清波。乘冰始渡河。置兵須近水。移營喜竈多。長坂初垂翼。鴻溝遂倒戈。的顛於此去。虞兮奈若何。空營衛青塚。徒聽田橫歌。

此指元帝江陵之敗

悲歌渡易水。弭節出陽關。李陵從此去。荆卿不復還。故人形影滅。音書兩俱絕。遙看塞北雲。懸想關山雪。遊子河梁上。應將蘇武別。

榆關斷音信。漢使絕經過。胡笳落淚曲。羌笛斷腸歌。纖腰減束素。別淚損橫波。恨心終不歇。紅顏無復多。枯木期填海。青山望斷河。

搖落秋為氣。淒涼多怨情。啼枯湘水竹。哭壞杞梁城。天亡遭憤戰。日蹙值

愁兵直虹朝映壘。長星夜落營。楚歌饒恨曲。南風多死聲。眼前一杯酒。誰論身後名。

日色臨平樂。風光滿上蘭。南國美人去。東家棗樹完。抱松傷別鶴。向鏡絕

孤鸞。不言登隴首。惟得望長安。

此應指蕭警

蕭條亭障遠。悽慘風塵多。關門臨白狄。城影入黃河。秋風別蘇武。寒水送荆軻。誰言氣蓋世。晨起帳中歌。

疇昔國士遇。生平知己恩。直言珠可吐。寧知炭欲吞。一顧重尺璧。千金輕一言。悲傷劉孺子。悽愴史皇孫。無因同武騎。歸守灞陵園。

倏忽市朝變。蒼茫人事非。避讒應采葛。忘情遂食薇。懷愁正搖落。中心愴有違。獨憐生意盡。空驚槐樹衰。

庾信和張侍中述懷

陽窮乃悔吝。世季誠屯剝。奔河絕地維。折柱傾天角。成羣海水飛。如雨天星落。負鍤遂移山。藏舟終去壑。生民忽已魚。君子徒為鶴。疇昔逢知己。生平荷恩渥。故組竟無聞。程嬰空寂寞。永嘉獨流寓。中原惟鼎鑊。道險卧槐

櫛身危累素殼漂流從木梗。風卷隨秋籜。張翰不歸吳。陸機猶在洛。漢陽
錢遂盡。長安米空索。時占季主龜。乍販韓康藥。伏轅終入絆。垂股猶離繳。
徒懷琬琰心。空守黃金諾。號郇終無寄。齊秦竟何託。大夫惟閔周。君子常
思亳。寂寥共羈旅。蕭條同負郭。農談止穀稼。野膳惟藜藿。操樂楚澁。忘
憂魯酒薄。渭濱觀坐釣。谷口看秋穫。惟有邱明恥。無復榮期樂。夷則火星
流。天根秋水涸。冬巖日不暖。歲晚風多朔。楊浮有怪雲。細凌聞災雹。木皮
三寸厚。涇泥五斗濁。雖忻曲轅樹。猶懼雕陵鵲。生涯實有始。天道終虛
索。且悅善人交。無疑朋友數。何時得雲雨。復見翔寥廓。

庾信夢入堂內

雕梁舊刻杏。香壁本沉椒。幔繩金麥穗。簾鉤銀蒜條。畫眉千度拭。疏頭百
遍撩。小衫裁裏臂。纏絃搗抱腰。日光釵蹙動。窗影鏡花搖。歌曲風吹韻。笙
簧火災調。即今須戲去。誰復待明朝。

庾信和詠舞

洞房花燭明。燕餘雙舞輕。頓履隨疏節。低鬟逐上聲。步轉行初進。衫飄曲

未成鸞迴鏡欲滿。鶴顧市應傾。已曾天上學。詎是世中生。

庾信登州中新閣

跨虛凌倒景。連雲詎少陽。璇極龍鱗上。雕甍鵬掖張。千尋文杏照。十里木蘭香。開窗對高掌。平坐望河梁。歌響聞長樂。鐘聲徹建章。賦用王延壽。書須韋仲將。龍來隨畫壁。鳳起逐吹簧。石作芙蓉影。池如明鏡光。花梁反披葉。蓮井倒垂房。徒然思燕賀。無以預鷓翔。

庾信奉報趙王惠酒

梁王修竹園。冠蓋風塵喧。行人忽枉道。直進桃花源。稚子還羞出。驚妻倒閉門。始聞傳上命。定是賜中樽。野鑪然樹葉。山柘捧竹根。風池還更暖。寒谷遂長暄。未知稻梁雁。何時能報恩。

庾信和王少保遙傷周處士

冥漠爾遊岱。淒涼余向秦。雖言異生死。同是不歸人。昔余仕冠蓋。值子遊風塵。望氣求真隱。伺闕待逸民。忽聞泉石友。芝桂不防身。悵然張仲蔚。悲哉鄭子真。三山猶有鶴。五柳更應春。遂令從渭水。投吊往江濱。

庾信別周尚書宏正

扶風石橋北。函谷故關前。此中一分手。相逢知幾年。黃鵠一反顧。徘徊應
愴然。自知悲不已。徒勞減瑟絃。

庾信別張洗馬樞

別後慘無言。離悲兩相顧。君登蘇武橋。我見楊朱路。關山負雪行。河水乘
冰渡。願子著朱鷺。知余在玄菟。

庾信將命使北始渡瓜步江

校尉始辭國。樓船欲渡河。輜軒臨磧岸。旌節映江沱。觀濤想帷蓋。爭長憶
干戈。雖同燕市泣。猶聽趙津歌。

庾信反命河朔始入武州

輕車初逐李。定遠未隨班。受詔祁連返。申威疏勒還。飛蓬損腰帶。秋鬢落
容顏。寄言舊相識。知予生入關。

庾信率爾成詠

昔日謝安石。求為淮海人。彷彿新亭岸。猶言洛水濱。南冠今別楚。荆玉遂

遊秦倘使如楊僕，寧為關外人。

庾信和趙王看伎

綠珠歌扇薄，飛燕舞衫長。琴曲隨流水，簫聲逐鳳皇。細縷纏鐘格，圓花釘鼓牀。膺風蟬鬢亂，映日鳳釵光。懸知曲不悞，無事畏周郎。

庾信奉答賜酒

仙童下赤城，仙酒餉王平。野人相就飲，山鳥一羣驚。細雪翻沙下，寒風戰鼓鳴。此時逢一醉，應枯反更榮。

庾信衛王贈桑落酒奉答

愁人坐狹邪，喜得送流霞。歧窗催酒熟，停柝問菊花。霜風亂飄葉，寒水細澄沙。高陽今日晚，應有接羅斜。

庾信答王司空餉酒

今日小園中，桃花數樹紅。開君一壺酒，細酌對春風。未能扶畢卓，猶足舞王戎。仙人一捧露，判不及杯中。

庾信舟中望月

舟子夜離家。開船望月華。山明疑有雪。岸白不關沙。天漢看珠蚌。星橋視桂花。灰飛重暈闕。莫落獨輪斜。

庾信詠畫屏風詩二十五首

俠客重連鑣。金鞍被桂條。細塵障路起。驚花亂眼飄。酒醺人半醉。汗溼馬全驕。歸鞍畏日晚。爭路上河橋。

浮橋翠蓋擁。平旦雍門開。石崇迎客至。山濤載妓來。水紋恒獨轉。風花直亂迴。誰能惜紅袖。寧用捧金杯。

停車小苑外。下渚長橋前。澀菱迎擁楫。平荷直蓋船。殘絲繞折蕩。菱葉映低蓮。遙望芙蓉影。只言水底然。

昨夜鳥聲春。驚鳴動四鄰。今朝梅樹下。定有詠花人。流星浮酒泛。衆瑱繞梧脣。何勞一片雨。喚作陽臺神。

逍遙遊桂苑。寂絕到桃源。狹石分花迳。長橋映水門。管聲驚百鳥。人衣香一園。定知懽未足。橫琴坐石根。

三春冠蓋聚。八節管絃游。石險松橫植。巖懸澗豎流。小橋飛斷岸。高花出

迴樓定須催十酒。將來晏五侯。

高閣千尋起。長廊四注連。歌聲上扇月。舞影入琴絃。瀾水纔窗外。山花即眼前。但願長歡樂。從今盡百年。

日晚金槌絡。朱軒流水車。轆拂緣堤柳。愛飄夾路花。定迎劉碧玉。將過陰麗華。非是高陽路。莫畏接羅斜。

徘徊出桂花。徙倚就花林。下橋先勸酒。跂石始調琴。蒲低猶抱節。竹短未空心。絕愛猿聲近。惟憐花逕深。

千尋木蘭館。百尺芙蓉堂。落日低蓮井。行雲礙菱梁。流水桃花色。春洲杜若香。就階猶不進。催來上伎牀。

搗衣明月下。靜夜秋風飄。錦石平砧面。蓮房接杵腰。急節迎秋韻。新聲入手調。寒衣須及早。將寄霍嫖姚。

出沒看樓殿。閒闕望綺羅。翔禽逐節舞。流水赴絃歌。細管吹叢竹。新柘捲半荷。南宮冠蓋下。日暮風塵多。

玉柙珠簾捲。金鈎翠幔懸。荷香薰水殿。閣影入池蓮。平沙臨浦口。高柳對

樓前上橋還倚望。遙看採菱船。

高閣千尋跨重檐。百丈齊雲度三分。近花飛一倍低。吹簫迎白鶴。照鏡舞山雞。何勞愁日暮。未有夜烏啼。

河流值淺岸。斂轡暫經過。弓衣溼濺水。馬足亂橫波。半城斜出樹。長林直枕河。今朝遊俠客。不畏風塵多。

度橋猶徙倚。坐石未傾壺。淺草開長埒。行營繞細廚。沙洲兩鶴迴。石路一松孤。自可尋丹竈。何勞憶酒壚。

上林春遶密。浮橋柳路長。龍媒逐細草。鶴唳映垂楊。水似桃花色。山如甲煎香。白石春泉上。誰能待月光。

白石春泉滿。黃金新埒開。戚里車先度。蘭池馬即來。落花承舞席。春衫拭酒杯。行厨半路待。載伎一雙迴。

將軍息邊務。校尉罷從戎。池臺臨戚里。弦管入新豐。浮雲隨走馬。明月逐彎弓。比來多射獵。惟有上林中。

三危上鳳翼。九坂度龍鱗。路高山裏樹。雲低馬上人。懸崖泉溜響。深谷鳥

聲春。住馬來相問。應知有姓秦。

聊開鬱金屋。暫對芙蓉池。水光連岸動。花風合樹吹。春柝猶雜沓。細果尚連枝。不畏歌聲盡。先看箏柱歌。

洞靈開靜室。雲氣滿山齋。古松纔幾樹。盤根無半埋。愛靜魚爭樂。依人鳥入懷。仲春徵隱士。蒲輪上計偕。

今朝好風日。園苑足芳菲。竹動蟬爭散。蓮搖魚暫飛。面紅新著酒。風晚細吹衣。跂石多時望。蓮船始復歸。

金鞍聚磧岸。玉軸泛中流。畫鷁先防水。媒龍卽負舟。沙城疑海氣。石岸似江樓。崩棧時半沒。壞舸或空浮。定是汾河上。戈船卽試遊。

竟日坐春臺。芙蓉承酒杯。水流平澗下。山花滿谷開。行雲數番過。白鶴一雙來。水影搖叢竹。林香動落梅。直上山頭路。羊腸能幾迴。

庾信寄徐陵

故人儻思我。及此平生時。莫待山陽路。空聞吹笛悲。

庾信寄王琳

玉關道路遠。金陵信使疏。獨下千行淚。開君萬里書。

庾信和劉儀同臻

南登廣陵岸。迴首落星城。不言臨舊浦。烽火照江明。

庾信和侃法師三絕

秦關望楚路。灞岸想江潭。幾人應落淚。看君馬向前。

客遊經歲月。羈旅故情多。近學衡陽雁。秋分俱渡河。

迴首河堤望。眷眷歎離絕。誰言舊國人。到在他鄉別。

庾信重別周尚書二首

陽關萬里道。不見一人歸。惟有河邊雁。秋來南向飛。

河橋兩岸絕。橫歧數路分。山川遙不見。懷袖遠相聞。

庾信送衛王南征

望水初橫隄。移營寇未降。風塵馬足起。先暗廣陵江。

庾信山中

澗暗泉偏冷。巖深桂絕香。住中能不去。非獨淮南王。

庾信和趙王看伎

長思浣沙石。空想搗衣砧。臨印若有便。為說解琴心。

庾信望渭水

樹似新亭岸。沙如龍尾灣。猶言吟暝浦。應有落帆還。

庾信塵鏡

明鏡如明月。恒常置匣中。何須照兩鬢。終是一秋蓬。

庾信題結綫袋子

交絲結龍鳳。鏤彩織雲霞。一寸同心縷。千年長命花。

庾信賦得集池雁

逢風時迴度。逐侶乍爭飛。猶憶方塘水。今秋已復歸。

庾信傷往二首

見月長垂淚。看花定斂眉。從今一別後。知作幾年悲。
鏡塵言苦厚。蟲絲定幾重。還是臨窗月。今秋迴照松。

李那奉和適重陽閣

銜悲向玉闕。垂淚上瑤臺。舞閣懸新網。歌梁積故埃。紫庭生綠草。丹墀染碧苔。金扉晝常掩。珠簾夜暗開。方池含水思。芳樹結風哀。行雨歸將絕。朝雲去不迴。獨有西陵上。松聲薄暮來。

隋詩十三家五十首無名氏四首

煬帝白馬篇

白馬金貝裝。橫行遼水旁。問是誰家子。宿衛羽林郎。文庫六屬鎡。寶劍七星光。山虛弓響徹。地迴角聲長。宛河推勇氣。隴蜀擅威強。輪臺受降虜。高闕剪名王。射熊入飛觀。校獵下長楊。英名敷衛霍。智策蔑平良。島夷時失禮。卉服犯邊疆。徵兵集薊北。輕騎出漁陽。進軍隨日暈。挑戰逐星芒。陳移龍勢動。營開虎翼張。衝冠入死地。攘臂越金湯。塵飛戰鼓急。風交征旆揚。轉鬪平華地。追奔掃鬼方。本持身許國。況復武功彰。會令千載後。流譽滿旂常。

煬帝春江花月夜

暮江平不動。春花滿正開。流波將月去。潮水帶星來。

古詩錄 卷十二
十一
煬帝四時白紵歌二首

東宮春

洛陽城邊朝日暉。天淵池前春燕歸。含露桃花開未飛。臨風楊柳依依。小苑花紅洛水綠。清歌宛轉繁絃促。長袖逶迤動珠玉。千年萬歲陽春曲。

江都夏

黃梅雨細麥秋輕。楓樹蕭蕭江水平。飛樓綺觀軒若驚。花簾羅幃當夜清。菱潭落日雙鳧舫。綠水紅妝兩搖漾。還似扶桑碧海上。誰肯空歌採蓮唱。

煬帝雲中受突厥主朝宴席賦

鹿塞鴻旗駐。龍庭翠輦迴。羶帷望風舉。穹廬向日開。呼韓頓顙至。屠耆接踵來。索辮擊羶肉。韋韞獻酒柸。如何漢天子。空上單于臺。

煬帝望海

碧海雖欣曠。金臺空有聞。遠水翻如岸。遙山倒似雲。斷濤還共合。連浪或時分。馴鷗舊可狎。乔木足為羣。方知小姑射。誰復語臨汾。

煬帝悲秋

故年秋始去。今年秋復來。露濃山氣冷。風急蟬聲哀。鳥擊初移樹。魚寒欲
隱苔。斷霧時通日。殘雲尚作雷。

侯夫人妝成

妝成多自惜。夢好卻成悲。不及楊花意。春來到處飛。

侯夫人自感三首

庭絕玉輦迹。芳草漸成窠。隱隱聞簫鼓。君恩何處多。
欲泣不成淚。悲來翻強歌。庭花方爛漫。無計奈春何。
春陰正無際。獨步意如何。不及閒花草。翻承雨露多。

楊素山齋獨坐贈薛內史二首

居山四望阻。風雲竟朝夕。深溪橫古樹。空巖卧幽石。日出遶岫明。鳥散空
林寂。蘭庭動幽氣。竹室生虛白。落花入戶飛。細草當階積。桂酒徒盈樽。故
人不在席。日暮山之幽。臨風望羽容。

巖壑澄清景。景清巖壑深。白雲飛暮色。綠水激清音。澗戶散餘彩。山窗凝
宿陰。花草共榮映。樹石相陵臨。獨坐對陳榻。無客有鳴琴。寂寂幽山裏。誰

知無悶心。

楊素贈薛內史

耿耿不能寐。京洛久離羣。橫琴還獨坐。停柝遂待君。待君春草歇。獨坐秋風發。朝朝惟落花。夜夜空明月。明月徒流光。落花空自芳。別離望南浦。相思在漢陽。漢陽隔隴岑。南浦達桂林。山川雖未遠。無由得寄音。

楊素贈薛播州十四章

在昔天地閉。品物屬屯蒙。和平替王道。哀怨結人風。麟傷世已季。龍戰道將窮。亂海飛羣水。貫日引長虹。干戈異革命。揖讓非至公。

兩河定寶鼎。八水域神州。函關絕無路。京洛化為邱。漳滏爾連沼。涇渭余別流。生郊滿戎馬。涉路起風牛。班荆疑莫遇。贈鷓竟無由。

五緯連珠聚。千載濁河清。金亡潛虎質。閔盡自蛙聲。聖期伊旦暮。天祿啟炎精。霧生三日重。星飛五老輕。禋宗答上帝。改物創羣生。

道昏雖已朗。政故猶未新。刳舟洹水際。結網大川濱。出遊迎釣叟。入夢訪幽人。植林雖各樹。開榮豈異春。相逢一時奉。共幸百年身。

有帛育邱園。生芻自幽谷。塵芳金馬路。瀾清鳳池澳。零露既垂光。清風復流穆。傾蓋如舊知。彈冠豈新沐。利心金各斷。分言蘭共馥。

自余歷端揆。緝熙愆時彥。及爾陪帷幄。出納先天暭。高調發清音。縹藻流餘絢。或如彼金玉。歲暮無凋變。余松待爾心。爾筠留我箭。

荏苒積歲時。契濶同遊處。閭闔既趨朝。承明還宴語。上林陪羽獵。甘泉侍清曙。迎風含暑氣。飛雨淒寒序。相顧惜光陰。留情共延佇。

滔滔彼江漢。實為南國紀。作牧求明德。若人應斯美。高卧未褰帷。飛聲已千里。還望白雲天。日暮秋風起。峴山君儻遊。淚落應無已。

漢陰政已成。嶺表人猶蠹。彈冠比方新。還珠總如故。楚人結去思。越俗歌來暮。陽鳥尚歸飛。別鶴還迴顧。君見南枝巢。應思北風路。

北風吹故林。秋聲不可聽。雁飛窮海寒。鶴唳霜皋淨。含毫心未傳。聞音路猶曩。惟有孤城月。徘徊獨臨映。弔影余自憐。安知我疲病。

養病願歸閒。居榮在知足。栖遯茂陵下。優游滄海曲。古人情可見。今人遵路躅。荒居接野窮。心物俱非俗。桂樹芳叢生。山幽竟何欲。

古詩錄 卷十一
所欲棲一枝。稟分豐諸已。園樹避鳴蟬。山梁遇雌雉。野陰冒叢灌。幽氣含
蘭芷。悲哉暮秋別。春草復萋矣。鳴琴久不聞。屬聽空流水。

秋水魚遊日。春樹鳥鳴時。濠梁暮共往。幽谷有相思。千里悲無駕。一見香
難期。山河散瓊藥。庭樹下丹滋。物華不相待。遲暮有餘悲。

銜悲向南浦。寒色黯沈沈。風起洞庭險。烟生雲夢深。獨飛時暮侶。寡和乍
孤音。木落悲時暮。時暮感離心。離心多苦調。詎假雍門琴。

盧思道權歌行

秋江見底清。越女復傾城。方舟共採摘。最得可憐名。落花流寶珥。微吹動
香纓。帶垂連理濕。權舉木蘭輕。順風傳細語。因波寄遠情。誰能結錦纜。薄
暮隱長江。

盧思道升天行

尋師得道訣。輕舉感人羣。玉山候王母。珠庭謁老君。前為返魂藥。刻作長
生文。飛策乘流電。彫軒曳白雲。玄洲望不極。赤野眺無垠。金樓旦蹇嶮。玉
樹曉氛氲。擁琴遙可聽。吹笙遠詎聞。不學蜉蝣子。生死何紛紛。

盧思道採蓮曲

曲浦戲妖姬。輕盈不自持。擎荷愛圓水。折蕩弄長絲。珮動裙風入。妝銷粉汗滋。菱歌惜不唱。須待暝歸時。

盧思道從軍行

朔方烽火照甘泉。長安飛將出祁連。犀渠玉劍良家子。白馬金羈俠少年。平明偃月屯右地。薄暮魚麗逐左賢。谷中石虎經銜箭。山上金人曾祭天。天涯一去無容已。薊門迢遞三千里。朝見馬嶺黃沙合。夕望龍城陳雲起。庭中竒樹已堪攀。塞外征人殊未還。白雪初下天山外。浮雲直上五原間。關山萬里不可越。誰能坐對芳菲月。流水本自斷人腸。堅冰舊來傷馬骨。邊庭節物與華異。冬霰春霜秋不散。長風蕭蕭渡水來。歸雁連連映天沒。從軍行。軍行萬里出龍庭。單于渭橋今已拜。將軍何處覓功名。

盧思道贈李若

初發清漳浦。春草正萋萋。今留素渥曲。夏木已成蹊。塵起星橋外。日落寶壇西。庭空野烟合。巢深夕羽迷。短歌雖製素。長吟當執珪。寄語當窗婦。非

閨惜馬蹄。

盧思道遊梁城

揚鑣歷汴浦。回扈入梁墟。漢藩文雅地。清塵暖有餘。賓遊多任俠。臺苑盛
簪裾。歎息徐公劍。悲涼鄒子書。亭琴落照盡。原野泣寒初。鳥散空城夕。烟
銷古樹疏。東越嚴子陵。西蜀馬相如。修名竊所慕。長謠獨課虛。

盧思道後園宴

常聞崑閭有神仙。雲冠羽珮得長年。秋夕風動三珠樹。春朝露溼九芝田。
不如鄴城佳麗所。玉樓銀閣與天連。太液回波千丈映。上林花樹百枝然。
流風續洛渚。行雲在南楚。可憐白水神。可念青樓女。便妍不羞澀。妖豔工
言語。池苑正芳菲。得戲不知歸。媚眼臨歌扇。嬌香出舞衣。纖要如欲斷。側
髻似能飛。南樓日已暮。長簷鳥聲度。竹殿遙聞鳳管聲。虹橋別有羊車路。
攜手傍花叢。徐步入房櫺。欲眠衣先解。半醉臉逾紅。日日相看轉難厭。千
嬌萬態不知窮。欲知妾心無劇已。明月流光滿帳中。

薛道衡昔昔鹽

垂柳覆金堤。蘼蕪葉復齊。水溢芙蓉沼。花飛桃李蹊。採桑秦氏女。織錦甯
家妻。關山別蕩子。風月守空閨。恒斂千金笑。長垂雙玉啼。盤龍垂鏡隱。彩
鳳逐帷低。飛魂同夜鶴。倦寢憶晨雞。暗牖懸蛛網。空梁落燕泥。前年過代
北。今歲往遼西。一去無消息。那能惜馬蹄。

薛道衡出塞

高秋白露團。上將出長安。塵沙塞下暗。風月隴頭寒。轉蓬隨馬足。飛霜落
劍端。凝雲迷代郡。流水凍桑乾。烽微桔槔遠。橋峻轆轤難。從軍多惡少。召
募盡材官。伏隄時卧鼓。疑兵乍解鞍。柳城擒冒頓。長坂納呼韓。受降今更
築。燕然已重刊。還嗤傅介子。辛苦刺樓蘭。

薛道衡豫章行

江南地遠接閩甌。山東英妙屢經遊。前瞻疊嶂千重阻。卻帶驚湍萬里流。
楓葉朝飛向京洛。文魚夜過歷吳洲。君行遠度茱萸嶺。妾住長依明月樓。
樓中愁思不開頰。始復臨窗望早春。鴛鴦水上萍初合。鳴鶴園中花併新。
空憶當時角枕處。無復前日畫眉人。照骨金環誰用許。見膽明鏡自生塵。

古詩錄 卷十一 十五 掃葉山房
蕩子從來好留滯。况復關山遠迢遞。當學織女嫁牽牛。莫作姮娥叛夫婿。
偏訝思君無限極。欲罷欲忘還復憶。願作王母三青鳥。飛去飛來傳消息。
豐城雙劍昔曾離。經年累月復相隨。不畏將軍成久別。只恐封侯心更移。
薛道衡敬酬楊僕射山齋獨坐

相望山河近。相思朝夕勞。龍門竹箭急。華岳蓮華高。岳高嶂重疊。鳥道風
烟接。遙原樹若薺。遠水舟如葉。葉舟旦旦浮。驚波夜夜流。露寒洲渚白。月
冷函關秋。秋夜清風發。彈琴即鑑月。雖非莊鳥歌。吟詠常思越。

薛道衡入柳江

仗節遵嚴會。揚舲泝急流。征塗非白馬。水勢類黃牛。跳波鳴石磧。濺沫擁
沙洲。岸迴槎倒轉。灘長船卻浮。緣崖頻斷挽。挂壁屢移鈎。還憶青絲騎。東
方來上頭。

薛道衡人日思歸

人春纔七日。離家已二年。人歸落雁後。思發在花前。

魏澹初夏應詔

雖度芳春節。物色尚餘華。出簾飛小燕。映戶落殘花。舞衫飄細縠。歌扇掩輕紗。蘭房本宜夜。不畏日光斜。

虞世基出塞和楊素

上將三略遠。元戎九命尊。緬懷古人節。思酬明主恩。山西多勇氣。塞北有游魂。揚桴上隴坂。勒騎下平原。誓將絕沙漠。悠然去玉門。輕齋不遑舍。驚策鶩戎軒。慄慄邊風急。蕭蕭征馬煩。雪暗天山道。冰塞交河源。霧烽黯無色。霜旗凍不翻。耿介倚長劍。日落風塵昏。

王春七夕

天河橫欲曉。鳳駕儼應飛。落月移妝鏡。浮雲動別衣。歡逐今宵盡。愁隨還路歸。猶將宿昔淚。更上去年機。

尹式送晉熙公別

太行君失路。扶搖我退飛。無復紅顏在。空持白首歸。色移三代服。塵化兩京衣。道窮方識命。事去乃知非。西候追孫楚。南津送陸機。雲薄鱗逾細。山高翠轉微。氣隨流水咽。淚逐斷絃揮。但令寸心密。隨意尺書稀。

尹式別宋常侍

遊人杜陵北。送客漢川東。無論去與住。俱是一飄蓬。秋鬢含霜白。衰顏倚酒紅。別有相思處。啼鳥雜夜風。

孔紹安別徐永元秀才

金湯既失險。玉石乃同焚。墜葉還相覆。落羽更為羣。豈謂三秋節。重傷千里分。促離絃易轉。幽咽水難聞。欲識相思處。山川間白雲。

陳子良送別

落葉聚還散。征禽去不歸。以我窮途泣。沾君出塞衣。

明餘慶從軍行

三邊烽亂驚。十萬且橫行。風卷常山陣。笳喧細柳營。劍光寒不落。弓月曉逾明。會取河西地。持作朔方城。

陸季覽詠桐

搖落依空井。生死尚餘心。不辭先入爨。惟恨少知音。

無名氏送別詩

楊柳青青著地垂。楊花漫漫攪天飛。柳條折盡花飛盡。借問行人歸不歸。
無名氏雞鳴歌

東方欲明星爛爛。汝南晨雞登壇喚。曲終漏盡嚴具陳。月沒星稀天下旦。
千門萬戶遞魚鑰。宮中城上飛烏鵲。

無名氏挽舟者歌

我兒征遼東。餓死青山下。今我挽龍舟。又困隋堤道。方今天下飢。路糧無
些小。前去三十程。此身安可保。寒骨枕荒池。幽魂泣烟草。悲損門內妻。望
斷吾家老。安得義勇兒。爛此無主屍。引其孤魂回。負其白骨歸。

無名氏歎疆場

聞道行人至。妝梳對鏡臺。淚痕猶尚在。笑靨自然開。